



Principáu
d'Asturies



Nota de prensa

Llunes, 27 de xunetu del 2026

Asturies conmemora cuatro décadas nel Festival de Lorient con una delegación compuesta por 150 persones y más d'una quincena de propuestas artístiques

- La representación del Principáu va ufiertar espectáculos de música, danza, cine y artes plástiques dende'l vienres viniente y hasta'l 9 d'agostu
- Los ganadores del Premiu Nacional d'Asturianada *La Busdonga* van asistir pela primer vez al eventu, que va incluyir tamién una esposición comisariada por Luis Feás y una banda de gaitas de la diáspora

La consejera de Cultura, Política Llingüística y Deporte, Vanessa Gutiérrez, presentó güei en Llaboral Ciudá de la Cultura la delegación oficial que va representar a Asturies nel 55 Festival Intercélticu de Lorient, que se va celebrar dende'l vienres viniente y hasta'l 9 d'agostu na ciudá francesa. Nel actu participó tamién el delegáu del festival n'Asturies, Iñaki Sánchez Santianes, xunto a una representación numerosa de los grupos y artistes participantes.

Anguaño cúmplese'l 40 aniversariu de la primer presencia institucional del Principáu nel eventu, empezada en 1986. Pa conmemoralu, la delegación va partir con 150 persones pa participar nel mayor alcuentru internacional dedicáu a les cultures celtas, con una programación qu'aúna tradición y creación contemporánea y que reflexa la bayura y diversidá del patrimoniu asturianu.

La edición d'esti añu, dedicada a Cornualles baxo'l lema *Cornualles, nel corazón de la mar céltica*, va axuntar a representantes de los territorios celtas d'Europa y América nun programa ampliu de conciertos, desfiles, esposiciones, alcuentros culturales y actividaes formatives. Cada branu, el festival congrega a cientos de miles de visitantes y afianzóse como'l gran escaparate internacional de les cultures d'orixe celta. Cuatro décadas depués del empiezu d'esa presencia institucional, Asturies encara esta edición con una delegación amplia y novedaes que reforsen la diversidá de la so representación.

La música y la danza tradicional van volver ocupar un sitiu protagonista cola participación de la Banda de Gaites *El Gumial*, el Grupu Etnográfico L'Oriente-Llacín, Rubén Alba, Llevólu'l Sumiciu, Herbamora, Ferla Megía, Entós y Rellume. Tamién va tar presente'l gaiteru Iñaki Sánchez

Nota de prensa

Santianes, que va actuar como solista xunto a Shaun Davey & L'Orchestre du Festival Interceltique. Ente les novedaes figura tamién la participación La Tarabica, la banda de gaites del Centru Asturianu de Guadarrama (Madrid).

La gaita asturiana va tener, amás, un papel destacáu nel Troféu *MacCrimmon*, ún de los momentos más emblemáticos del festival. Diego Lobo Tuñón, Pelayo Cordero, Pelayo Suárez y Nel Cortizo van competir nesti certame internacional tan prestixosu. El primeru d'ellos va impartir, amás, una clas magistral, mentes que Francisco López Delgado y Eduardo Llosa van formar parte del xuráu.

La delegación va cuntar tamién con representación nel Interceltic Music Camp, onde Julio Rodríguez va participar na especialidá de buzuki y Celia Nieto na de violín, dientro d'un programa qu'axunta a mozos intérpretes de territorios con raigaños celtes pa compartir formación y esperencies.

La canción asturiana va viaxar a Lorient de la mano d'Alicia Villanueva Megido, Esteban Verdeja Martínez y Néstor Díaz González, ganadores del II Premiu Nacional d'Asturiana *Obdulia Álvarez La Busdonga*, qu'anguaño s'incorporen pela primer vez a la delegación oficial, frutu de la collaboración ente'l Gobiernu d'Asturies y la organización del festival pa impulsar la promoción internacional de la tonada.

La presencia asturiana va completase cola proyección de la película *Muyeres*, dirixida por Marta Lallana, y cola esposición *Apuntes dende Bretaña: pintores españoles nel Finisterre francés*, comisariada por Luis Feás, una propuesta que pon el focu nos vínculos históricos y culturales ente Bretaña y España. La incorporación d'esta muestra constituye otra de les novedaes de la programación.

Asina, Asturies va volver posicionase nún de los foros internacionales principales con una delegación que reflexa l'amplitú del so panorama cultural. El 40.^u aniversariu dexa, amás, poner en valor una presencia institucional continuada que convirtió Lorient nun espaciu estable pa la proyección exterior de la cultura asturiana.

Música, danza, patrimoniu inmaterial, creación contemporánea, cine y artes visuales van compartir escenariu en Lorient pa ufiertar una imaxe d'Asturies abierta al intercambiéu cultural, arguyosa de la so identidá y comprometida cola difusión del so patrimoniu dientro y fuera de les sos fronteres.